

四庫全書

集部

欽定四庫全書

集部
東里詩集卷二

詳校官檢討_臣羅國俊

中書_臣劉源溥覆勘

總校官進士_臣楊懋珩

校對官中書_臣范鏊

謄錄監生_臣周桐

欽定四庫全書

東里詩集卷二

明 楊士奇 撰

五言律

次韻陸伯陽林塘晚詠兼簡雷道夫

二首

金門趨講罷西園日暮時繁陰交雜樹輕浪散清池玩
芳因坐久延月却歸遲還與同袍侶攜手詠新詩

高居傍城闕隙地富園林天風下修竹鏘鏘韻玉琴浮
觴清沼曲憇石碧梧陰別有聞佳詠因之仰素心

貧樂堂

草色蔭松門青山綠樹村種蔬成小圃飲水必澂源每
究賢人樂時同靜者論窮通自有分非為薄華軒

觀海生詩為臨海令作

作縣臨東海當年眺覽中水雲連浩渺心境合昭融已
愜觀瀾趣還思作楫功有才終利涉非比望洋同

高巨川輓詩

保障臨江曲荒城已半隳重尋耆舊傳愁說亂離時鄉

里思遺德河山識令儀孤墳三尺在落日有餘悲

善樂堂

家惟經籍富數世坐丘園善樂承先訓心清味道言穿林無曲徑引水得澂源旦暮悠然處南山正對門

題貝教諭容與軒

金川帶玉筍此地託幽軒旦暮無塵事絃歌近縣門傍花晴散帙延月夜開樽容與存吾道長令學者尊

送舒有常知縣赴永春

幸際文明世誰甘畎畝民再來趨北關九月赴南閩紅
樹吳門郭青帘海上津有才當撫字卓魯亦何人

贈魏將軍

鍔馬載琬弓身輕百戰中聖朝初偃武高爵竟論功帶
鏤銀花白衣裁繡錦紅西清五雲下長衛大明宮

賦得滄浪送陳景祺之襄陽知府

漢水帶襄城滄浪舊有名分符來五馬如練照雙旌濟
涉思為楫聽歌想濯纓須令郡人說堪比使君清

送給事中姚山赴河南僉憲

觀風在激揚今喜擢蘇章袖有銀臺筆衣含玉殿香
河流明憲節嵩嶽對公堂想見澄清日歌聲滿洛陽

高郵

四顧無山色蒼茫極遠天水雲涵郡郭杭稻被湖田
草舍津頭市菱歌柳外船羈愁念前路非為別離牽

過武城縣

河上皆民舍波光映葦扉青裊沽酒過白髮載鮮歸
倉

康豐年積絃歌古俗稀征颿未可住還逐暮雲飛

任丘道中

霜柳未全稀風沙不住飛居人過驛盡獵火隔河微客
路衝寒景天恩戀禁闌金臺行漸遠回首思依依

晚次景州遇李頗給事呂文質進士

下馬郭西村蕭條盡掩門荒城明落景獨樹出平原野
水條侯墓寒蕪董氏園閒因訪遺事邂逅故人論

重過濟寧

閭井皆臨牖郊原四望平橫峯連岱嶽分水向彭城
鼓屯千騎舟車會兩京沿洄未能住俱是重王程

輓盧侍郎

二首

三十趨京國同時復有誰貴為祈父佐長在縉雲司物
化嗟何速神遊不可知淒涼山浦側千古葬靈輶
無復相逢處相思每獨哀真成鵬鶚奮忽殞棟梁材草
露晞還落河流去或迴空餘一片月夜夜照中臺

送張鳴玉贛州知府

北關捧恩榮西江戒驛程悠悠驅五馬冉冉度雙旌政
得度人愛心如贛水清崆峒千丈碧應勒使君名

送胡元節廣西憲使

驄馬赤茸鞦臨岐嘶未休朝廷用儒雅風紀得才猷天
遠三湘外霜含八桂秋貪漁嗟薄俗表率在名流

早度清流關

地險雄江北崩雲亂石高古人成敗遠行客往來勞霧
壑疑藏豹風林訝嘯猿五年重過此霜點舊青袍

蕭知州清省居 二首

白髮灤州守邦畿久著稱
心清何所似皎潔玉壺冰
數米功難致烹鮮道可憑
從知清淨理未愧古人能
解字清如水時平案牘稀
堦前幽鳥下簾外白雲飛
易簡民從化廉平吏息機
鳴琴過日夕玩月澹忘歸

非所寄示康甥榮

旦暮園扉下清羸念爾身
閉門堪避俗省事足怡神
藥裏時常檢書燈夜少親
亦知相念切來問勿頻頻

題劉士皆雲林小畫

春霧曉初收
春山翠欲流
林霏疑雨潤
嵐彩近天浮
故里三華麓
當年一葉舟
看圖渾彷彿
虛負水亭幽

月池彭母輓詩

二首士
揚之母

七十人間世
嫠居四十餘
冰霜明婦節
燈火課兒書
堂掩春暉暗
烏啼夜月虛
白頭遊子淚
和血灑衣裾

誰不為孀婦
風霜苦自持
人情易衰薄
親戚厭嫠嫠
舊篋藏遺簡
寒機理斷絲
百年池上月
曾照育孤時

題楊學士畫 二首

羣山開奕奕清磴繞
沄沄巖巖疑浮玉巘
岬訝染纁巖芝香可茹
林翠暖如熏想見幽棲者
塵喧了不聞素琴兼白鶴
瀟灑散高蹤境類金精迴
山如玉筍重泉香流石乳霞
彩拂虬松溪上桃花滿
神仙倘解逢

夜雨壞壁簡鄰居諸君子

雨深頽屋壁夜起攬衣趨
入室風翻幔緣階水倒渠
未沈爨下釜急護案頭書
得似東西舍高眠總晏如

送劉編修朝宗赴九江教授 二首

昔過潯陽郡，憑高暢客情。
廬山當近郭，江水帶孤城。
茅屋家家淨，漁舟箇箇輕。
廣文懷散逸，此去課諸生。
去上還鄉路，天恩便養親。
拜辭金殿直，謝別玉堂人。
山水濂溪近，風煙栗里鄰。
懷賢知有志，應不負青春。

行天壽山

連騎去駸駸，緣岡復度林。
杏花明似繡，楊柳淡含金。
萬物亨嘉日，先朝種植心。
白頭供俸在，俯仰一霑襟。

曉起

曉起侵風露黃埃湧素袍如林行隊伍緣澗耀旌旄細
馬馳能捷蒼鷹奮欲高從臣稀奏賦心切聖躬勞

行營夜雨

雨來從薄暮霑灑夜將闌稍喜塵埃息何由衾席乾天
心存發育人事有憂歡森立戈及士通宵念爾難

早行

聯騎載旌旄移營亂壠田人行風露下月轉斗牛邊涉

潤泥沾袂穿林草沒鵝數家茅屋小彷彿見炊煙

衝雨

晨起衝寒雨艱難念僕夫山田行沮洳石徑度崎嶇矯
矯虞張弋桓桓士執殳肩輿扶老病扈蹕愧殘軀

次韻黃少保過田家有感

水旱農艱食茲鄉實可嗟掃田紛拾稗為飯雜蒸沙歲
賦徵仍急秋成望苦賒吾徒何補益肉食老京華

晚度密雲北山絕頂

常奉垂堂戒其如扈蹕何高疑登玉壘近恐逼銀河宛
轉捫蘿上低回避石過前途看漸晚力盡敢蹉跎

送周布政之官三山

御苑柳初春龍河冰始泮祇命辭彤闥驅車候清旦超
遙起雲翼光華升玉璫遠別期譽名無為乖闕歎

題梅花圖

昔者江南住棲遲萬玉林只今圖畫見遺恨別離深凜
凜歲寒意娟娟冰雪心北人知愛少閒伴小窗吟

送袁文理 二首

昔我艱虞日於君邂逅歡相看羨玉樹遂擬託金蘭歲
月分攜久江湖聚晤難喜聞嘉政滿薦剡出臺端

入覲初相見陞除遽不留還尋江左路問買浙西舟桑
梓歸應蚤萼鱸到及秋佇聞寬恤治為解別離愁

寄尤文度 二首

苦憶尤叅議投簪養病勞卑棲人總厭閑散自能高厨
却胡奴米門深仲蔚蒿平生冰雪意猶足重吾曹

三年別帝京，臥闔閭城。貧病疎朋友，艱難倚弟兄。
焚瓦鼎，細寒擁紙屏。清自有床頭，易時時暢道情。

寄黃宗豫少保

佩玉娛親日，衣拋五色文。身閒疎藥裹，庭靜對爐熏。
醉寫泉頭竹，吟看海上雲。從知蕭散地，一飯不忘君。

鄒謙所孝思堂

墓築蕪湖縣，因之託數椽。却思嚴譴日，感泣更生年。
十口今誰在，孤身祇自憐。朝朝松柏地，拜跼薦寒泉。

早發

行營侵曙發風露不勝清
海色微茫動林霏杳靄生
六軍嚴虎衛萬騎翼霓旌
七九流年外含毫扈遠征

觀獵

揚旌表四岑環戟擁如林
已失千尋險寧遺三穴深
春蒐元有典時育亦闢心
解網商王德光輝尚至今

早入薊州

古漁陽郡

極目平無際青山畫不如
彩雲迎霽旭翠柳帶澄渠
地

重城逾壯年豐廩有餘未應兩岐詠獨係漢人書

自題小像寄鄉邑親故

兩京三十載夢寐在鄉閭叨祿承明主匡時愧腐儒淹
留鞭帶緩愁思鬢毛疎惟有秋霜意今吾是故吾

送黃養正

二首

歷事三朝聖曾蒙當宁知手持五色筆常在鳳凰池雪
霽城南路春融柳外澌還家自足喜報國豈應遲

文明門外柳頻折送人歸竊祿吾何補懷鄉志屢違越

潮天際白吳樹雨中微羨爾乘仙舫東南去似飛

送陳公餘赴台州教授詩

有序
二首

表姪陳公餘不相見十年比以棗陽教諭考滿來北
京留四閱月旦夕聚處得慰藉每用感念前十六七
年公餘及其弟公延在南京以世姻故於予相聚甚
樂而與公延聚尤久今公延墓木拱矣余未嘗不思
之而悲聞其孤孱弱不立又未嘗不自愧無能以
振起之也間與公餘及此皆用歔然公餘今陞教授

將赴台州蓋予又有感者始予至京師台之文學老
成在詞林學省者皆與予厚有相益之樂而淪謝盡
矣每一追念悵然無已然聞其鄉風流文雅故在也
公餘得典教於此足以行志將人才日益有出而餘
力亦必可以及異故因作詩贈公餘并記所感云
陳氏聯雙璧京華舊合并蚤終悲令弟久別見難兄受
命辭丹闕之官向赤城相逢已多嘔相送更勝情

海上天台郡雲邊島嶼青交游如昨日夢寐想平生鄉

里風仍厚詩書化易行公堂無外事絃誦有餘清

鄭村壩

內廡牧地

十里都城外天清見遠山斷渠冰奠玉連樹葉飛丹牧

苑千羣出耕畬萬頃閒賜田思往事雙淚不勝彈

洪熙元年

四月賜士奇田二頃於此當時辭之踰月官車晏駕矣

早發李家橋

霜氣欺貂帽風埃壓毳袍天連東海近斗轉北辰高戈戟紛成隊衣冠總屬橐衰年仍竊祿扈蹕敢辭勞

應制兩詠

五色鸚鵡

異質超同類光輝五色并非關憐巧語所重表文明香
粒金為勺甘泉玉作罍君恩無限好能忘隴山情

白鳩

本與鳳同類名官自昔時蕭蕭閑雅意皎皎潔清姿金
屋看尤好瓊林息正宜和鳴致甘雨豐歲足公私

扈從度居庸關登八達嶺

盤迴躋峻嶮嵐翠濕紛紛巘路平銀漢關樓俯白雲朝
廷須講武扈從總能文獨立舒長嘯風清上界聞

岔道觀獵

已度重關險初臨廣野平嵐無遠水白山擁半空青扈
蹕同三事蒐原合五兵農閒陪閱武亦得暢予情

聞角

風靜周廬夕營門角起愁不須三弄徹對月淚先流楊
柳飄還合梅花落未休鄉心已無限何必在邊州

輓黃行中檢討

霜霰零瓊樹天寒一夕摧
竟如東逝水無復却西回
世數金閨彥人思玉署才
舊時來往路重過不勝哀

黃處士輓詩

簪組名家後詩書奕世承
艱危持行義蕭散在林垞
韶光驚石火精爽閱泉扃
徒使相知者含悲誦塚銘

樊通政雪霽草堂

輕風解寒冱初日麗丘林
簷際瀉懸溜窗中見遙岑
清

和蕩淑氣浩暢發冲襟餘色皎如玉吾將比素心

勉仁少傅行營置酒就席奉簡同寅

萬乘行春日千官得共陪石林穿窅澗道歷遄迴酒
載黃封賜人聯玉署才解鞍廬帳下隨意瀉金壘

送襄陽王時中知縣

銅章仍出宰金闕已知名歸治中牟縣重經故郢城輕
霞江樹曉疎雨漢皋晴還憶滄浪曲清泠好濯纓

獨遊山寺奉簡宗豫少保勉仁少傅弘濟太常

扈蹕愧無能同官喜得朋芳林時獨往清境遂閒登碑
古封文蘚泉幽冪翠藤欲題巖畔石歷覽記吾曾

夜發岔道赴懷來

明月下西嶺天高北斗斜驚風起中夜捲地簸飛沙磊
磊道間石喧喧橋外車過城曙色動連騎發簫笳

早發老鴉莊

鼓角動行營翩翩從羽旌月明人影亂沙軟馬蹄輕本
乏籌邊略恒存事主誠叨榮何補益慚愧負平生

早發安家堡

上馬逐西風風寒夜正中衆星斜轉北一水背馳東不
恨馮唐老虛懷杜甫忠祇勤扈龍馭何暇恤微躬

望昌平

百里近皇都蕭條邑井孤夏霖頻汎濫秋穀竟虛無官
府猶徵役朝廷已罷租緬懷劉諫議千載愧吾徒

五言排律

送向誠隨侍赴九宮山

神境三光表王車十月行霜隨龍旆肅風送馬蹄輕雲
館迎千乘仙臺望五城巖前金竈古樹杪玉泉鳴聽講
淮南道聞吹子晉笙遙知隨侍好頻有詠歌聲

題山水畫

際海飛初旭凌空疊遠岑嵐端浮石笋霞畔擁金林島
嶼紅濤上藤蘿翠壁陰連帆乘浩渺高閣倚嵌崟江路
緣頻轉雲居望轉深依微廬阜下彷彿越溪潯展玩銷
紛慮經營見苦心定應何處所思與謝公尋

送王瀘淵改訓導上杭

寥落新安邑橫經已十年
朝盤食有粟夜榻坐無氊
濟來衿佩洋洋聽誦絃
學規兼體用祀禮備精虔
東魯文衡撤南閩教鐸遷
肯辭行道遠自喜過家便
天霽雲橫嶽潮平雨溢川
別離將萬里書問若為傳

餘姚陳氏嘉會樓

邑里稽山麓樓居浙水湄
雕欄出翠樹藻井映華芝
遠眺通吳會高攀近尾箕
箕雲乘鸚鵡落瀑帶鳳凰
垂聖化

昇平日天恩長養時四郊無夜警萬物藹春熙
明有如
坻積歌聞擊壤辭都將欣愜意持用表蘭楣

分題送史郎中代時彥學夔德遵

三首

驛樓

靡靡遵歸路岩岩見驛樓朱簾迎日捲畫拱礙雲浮
眺
覽通恒岱躋攀切斗牛乘輶來使節馳驛駐行騶送爾
今重過憑高試一留詩成清似玉灑翰記曾遊

河梁

河水深無極河梁構石崇暎波疑墜月倚岸訝垂虹華
表東西出蘭舟上下通屢經題柱客誰論濟川功楚古
苔紋暗亭虛柳色濃送君攜手處征騎莫匆匆

芙蓉

菡萏開初盛池塘及早秋根從玉井得葉似鏡湖稠麗
彩凝雲動清香抱露浮娉婷漢女出窈窕洛神遊折贈
寧忘遠聽歌或弭愁惟將君子意臨別寄綢繆

七夕送丁侃吳江教諭

玉露下青冥，銀河會兩星。故人當遠別，獨棹發前汀。
曉月滄州路，秋風泗上亭。菱荷香欲過，楊柳翠將零。
小邑連吳郡，青山滿洞庭。官居自有適，況乃坐譚經。

代德遵送嚴士正赴江陰訓導

得來字

之官辭玉闕，送別傍金臺。暫駐城陰騎，同傾柳下杯。
念離俱繾綣，欲發更徘徊。遠樹青如薺，春波綠勝苔。
路馳兼水陸，舟汎歷沿洄。之子儒家秀，前賢世德培。
羽儀明鸞鷟，器質抱瓊瑰。聖代蜚騰早，亨衢特達開。
三吳推道院，

百里富英才習禮延陵邑談詩匡鼎來道存人自化意
澹俗無猜此去應相憶題書寄鴈回

題金學士畫

誰寫江皋趣披圖憶漢南清巒連嶽麓幽渚帶湘潭樹
色浮青靄巖光蕩翠嵐漁家臨水靜禪刹與雲參窈窕
緣汀路微茫隔浦颿平生蕭散意對此欲抽簪

七言律

題吳逸人二雲山房

凌雲並立兩山青山下幽居靜不扃晴分黛色明香几
畫擁嵐光落硯屏蒼龍來問還丹訣白鶴聽譚大洞經
門前澗底朝朝去更采昌陽九節靈

送元先輩歸吳

門巷蕭條過者稀諸孫憔悴日牽衣豈無幕下三年客
又送吳中一棹歸漢樹臨風寒自落江鴻帶雪晚猶飛
由來去邑懷桑梓不是還山戀采薇

陸氏滄浪漁隱

漁村深映綠楊煙門外漚波日放船興逐浮雲看不厭
坐乘流水去悠然橫江月出時歌榜別浦風清亦扣舷
常年獨泛滄浪曲不羨遭逢渭水邊

陳氏環翠軒

瀟洒軒居翠作圍遙看鬱鬱又霏霏濃含野樹晴如滴
亂濕山雲曉不飛綵服凝輝當舞席牙籤分映滿書帷
湖波近繞闌干曲更詫新荷好製衣

和陸伯陽池上梅花

園裏池邊一樹花連松傍竹似山家香浮書幌風初動
影上琴床月半斜延客別穿幽徑入接鄰更築短牆遮
憑教橫笛休驚落愛此來看日正賒

約蔡尚遠朱存禮蔡用嚴尤文度楊仲舉遊東

山

東山東望屹如帷久待穿雲躡翠微五色煙霞浮寶塔
千行松竹護禪扉春來況復芳菲盛客裏堪嗟聚晤稀
為報明朝著雙屐及時清賞莫相違

及期過邀朱存禮不遇用韻督之

淹留不下董生帷徒向青春歎式微遊賞久懷躋勝境
招尋頻值掩高扉雲開石磴看逾近風捲花枝覺漸稀
便趁晴明行載酒謝公那得更相違

雨中感懷

明日立秋

簷前水到竹棚頭簷下雨鳴殊未休挾冊兒童斷來往
傍籬鳬鴨自沈浮即過東家邀短筏莫須西埠買輕舟
客懷坐此堪惆悵風景蕭條況近秋

次韻龔鄧存誠見贈

清詩頻誦解人頤客裏逢君恨獨遲行枉高軒無隔日
坐談虛館屢移時潛心共慕顏生樂攜手俱忘墨氏悲
從此相望巷南北朝朝來往話深期

泊金口次友人韻

屬玉飛鳴沙嶼傍梅花如雪照晴岡數家茅店臨金口
百里山城望漢陽浣女映紗寒水碧棹郎吹簫暮雲長
鄉關迢遞鄉書杳愁立西風看鴈翔

五月四日暮雨感懷

去歲以是日同諸友
遊東山暮歸值雨

翠微清旦逐攀緣攜手翩翩記昔年
巖際穿花經宛轉閣中御酒坐留連
悠悠逝日隨流水杳杳高情各遠天
俱在茲晨興暮雨東門歸處不悽然

和鄭孟宣助教左掖聞鶯

新鶯飛集萬年枝宛宛流音欲曙時
乍協仙韶當紫殿更諧瓊珮近彤墀
九天春日初留聽千里雲林獨繫思
惟有鄭虔才調絕朝回洒翰一題詩

賦得漢陽送朱季寧湖廣僉憲

大別山前爽氣浮
吳王磯對庾公樓
江流東道從何日
漢水西來會此州
萬里朝宗歸一派
兩城冠蓋列諸侯
先聲傳報迎霜節
遙想澄清澈上游

送姚侍書歸覲

載筆三年侍禁闈
青春文翰有光輝
天恩暫別雙龍闕
家慶新裁五色衣
解纜晴江楊柳綠
升堂朝饌鯉魚肥
鳳凰池上來應早
莫待林花散亂飛

送黃叔昭歸文江

賜歸初買上江船，歸路何因復愴然。
渡海幾人還故里，到家三月及春田。
碧梧丘壠回生色，綠水園林捲宿煙。
莫歎物情非夙昔，青山還映舊門前。

從狩陽山和胡學士韻

王師晨獵大江東，文武千官扈從同。
萬乘旌旗隨玉輦，九霄鴻鵠避彤弓。
青山半掩浮嵐白，碧澗深流落葉紅。
甘露滿林歌瑞應，知君能賦擅才雄。

是日甘露降陽山

從狩武岡和胡學士韻二首

是日甘露復降武岡

丹崖翠嶺接峒堯萬騎交馳不憚遙
前隊綵旄穿碧樹中軍黃幄麗晴霄
雲藏網罟參差出草合岡原邈迤燒
農事已閒脩武事共懷詞賦從鑾鑣

雪消輦路不生塵和氣冲融已發春
玉露應期呈上瑞金吾傳勅賜羣臣
鴻圖萬歲歸神武盛事三驅睹至仁
冠劍股肱咸扈從丹青預想畫麒麟

送林僉事赴陝西

金匱要略卷二
曉別詞林出帝畿關中使者繡為衣三年譔述推多學
一道澄清屬有威月滿渭川宜獨照霜含秦樹已先飛
君王肝食勤西顧早晚封章達瑣闥

送鄭御史赴四川

青春衣繡有輝光况復馳聲白玉堂承詔早持班氏筆
賜歸先過鄭公鄉驛亭解纜江潮急官舫聞猿峽路長
遙想三川舊行處重來隨地凜飛霜

送黃伴讀

青春千乘發京師
花映鑾轡柳映旗
官屬盡看歸侍從
交遊那忍話分離
碧堂進講趨常早
玉醴承恩出每遲
想得公餘憶鄉舊
還應題句報相思

送沙同知赴祿州兼問克偉消息

貳車南去撫烝黎
雪色梅花滿路歧
問俗遙連交趾郡
到官正及艷陽時
已知寡欲能勝瘴
預喜多才會變夷
為訪龍州曾貳守
久無書札寄京師

送全州知州

新年考績天官日第一皆傳太守名鳴珮又辭雙鳳闕
掛帆遙轉九江城天涯草色縣縣綠湖上楊花片片輕
還到清湘三月暮郭南騎馬勸春耕

送向武金吏目

一命微官萬里程清時行送魯諸生天連粵徼孤城險
家渡湘江數口輕楊柳飛花霑去棹枕榔雜樹亂離情
才高莫歎淹遐僻政滿還來謁聖明

題竹寄蕭安正

修竹紛紛蔭石臺，高樓新傍竹西開。
青天彩鳳盤雲下，白日鸞歌度澗來。
南阮詩書連絳帳，東山蒼翠落銀杯。
桃花流水三年別，又擬青春放棹回。

送劉敦信致仕

七十懸車世所稀，先生六十遂南歸。
兩行霜鬢辭天去，一片秋帆帶雨飛。
松逕晚晴蒼鹿近，石田雲緩玉芝肥。
休官自此無塵事，惟有門人日款扉。

送周給事使西南夷

仙郎意氣清如玉每接班行共早朝
久立銀臺簪彩筆又銜丹詔下青霄
蠻方草木含天澤驛路風雲擁使軺
想見馳驅遍南徼日聞重譯頌唐堯

送徐崇威陝西理問

初歸西掖掌絲綸共喜中朝接縉紳
練達久明欽恤意遷除又拜寵恩
新舟移漢水還經楚路入函關遠向秦
華嶽秋清五千仞行應挂笏看嶙峋

靈谷寺建追薦征南將士水陸大齋車駕臨祭

先夕百官出候寺中

晚出東華赴上方滿衣月色動微涼
鐘聲漸識齋壇近松影遙連輦路長
澗底玉泉鳴石磬雲邊紅燭亂星光
歡迎天上來龍馭一夜祇園散好香

文華門侍朝觀錄囚多所寬宥喜而有作

日麗文華霽色新爐煙不斷上麒麟
大臣論讞持王制睿旨全生體帝仁
真儼下車興歎泣旋看解網動歡欣
朝廷寬大恩波厚慶衍皇圖億萬春

卧病院中寄黃學士

三旬抱疾卧齋閣忽報春風謝絳桃
草色新含時雨綵楊花紛逐曉雲高
屢承恩賜身難報閒聽朝車思轉勞
想見詞垣多召命日趨東殿獨揮毫

冬至早朝遇雪和胡學士韻

履長慶罷天顏悅和氣冲融散雪來
為瑞正當鵲鵲觀飛花還過鳳凰臺
彤墀颺彩龍旂動玉几凝輝寶扇開
共上君王千萬壽九成歌舞進瓊杯

諸公從狩龍山因登牛首山訪佛窟寺胡學士
有詩是日僕以病不及行想像佳遊輒用次

韻三首

吉日鳴鑾出九關龍山扈從喜躋攀雲迎翠輦晨先合
鳥避黃麾夕未還獵火依微煙岫裏鳴笳縹緲石林間
羣臣咸睹三驅樂賤子空慚一日閒

寶刹藏雲近翠微世人聞說到應稀千年飲馬泉仍在
半夜巢松鶴自歸碑存古刻題朝代僧有閒情熟道機

應話無生因坐久不辭香霧惹朝衣

寺外幽巖石逕斜巖中開士似丹霞心涵水月空諸法
坐對寒崖落一花清夜潮音翻貝葉常時雲氣護袈裟
匆匆遙望知難覓歸騎聯翩擁翠華

寺外有石巖一僧棲禪其中久矣諸

公頗以未
遊為欠

同金諭德踏雪出長安街金墜馬在告不及往

問明旦奉簡

雲映都城一色妍暮街騎馬共翩翩初當分手迴絲鞵

驚看翻身墜錦韉，鳴珮紛趨天闕下。
聞鐘獨卧曉窗前，平戎萬里隨龍馭。
意氣能無歎往年。

題吳中書所蓄徐御史寫梅

清江先生如玉雪，舊種寒梅今滿庭。
閒時撫樹得籀法，殘歲開花映壁經。
鳳沼香雲隔塵滓，霜臺白筆寫神形。
朝回何遜誰相問，定在金陵竹葉青。

別用之後其夕聞尚留江上賦此奉東

日出高城啼曙烏，城邊風色柳疎疎。
關河歲晏侵冰雪，

客子天寒歎道途
旦乘潮應鼓柁
誰家燒燭且傾壺
平生未解傷離別
却掩衡門坐鬱紆

贈梁本之

二首

渺茫何處望瀘州
已拜除書去不留
七十慈闈雙別淚
五千蜀道一孤舟
皆傳遠邑民情好
親見諸生禮數優
到日平安寄魚素
殷勤先慰倚門愁

蜀山消盡雪皚皚
江水初平滌瀨堆
問路遙穿三峽過
之官惟帶一經來
林間女負已鹽出
煙際人乘犢騎回

莫歎遐方異風俗此州元有穆清臺

九日過宿遷縣

掛席迢遙晚未休行程邈迤望邳州數家農舍通籬落
幾處漁舟聚汴流回首鄉園天渺渺驚心時序水悠悠
紫萸黃菊非無意沙鳥汀雲漫自愁

蒙恩南還陛辭後出文明門留別詞林知己

雙闕凌雲晃曙輝君恩初拜下彤闈西山雪霽千峯出
遠道天寒一騎歸翰苑故人多契濶離筵芳酒又分違

相思後夜瞻銀漢奎壁光華映紫微

十月十六日侍從赴北京出江東門

十月朝天趨薊北城中爭送向江皋朋儔載酒飛觥數
兒子褰裳徒步勞滿路和風喧鼓吹中天晴日耀旗旄
紛紛喜氣隨行騎回首鍾山紫翠高

滁州陪獵次林光祿韻

日華朝映彩雲西紅樹青山望不迷罽網合圍笳鼓振
戈矛分隊羽旄齊歡呼春動三軍色騰踏風輕萬馬蹄

侍從如雲陪樂事郊原霜淨不霑泥

尋醉翁亭故址

空山泉石四無鄰亭構當年已化塵前輩文章闕氣運
後來瞻仰愧鄉人寒林縹緲荒煙外霜逕逶迤古澗濱
景物已殊風俗在壺漿來往見滁民

鳳陽過宿族兄弘璧夜話

十五離鄉今七十版圖已作帝鄉民田園晚歲治生足
兒女全家習俗淳猶有詩書傳世業不勝悲喜見宗親

百年楊氏衰兼盛一夜燈前語向晨

趙彥如輓詩二首

瀟洒清風滿素襟况兼文采映儒林聖朝賢達皆推轂
晚歲京華始盍簪書閣淹留春酒熟齋房談詠夜燈深
年來漸覺朋游減坐看晨星愴寸心

鄰並紫垣南畔住尋常來往共襟期可憐病起分攜後
無復朝回坐對時學行尚存輿論好交遊未澈士林悲
鳳山原下千年石不愧當年有道碑

幽居二首簡時彥學夔習禮

時自翰林改春坊職務甚簡

白日紅塵渾不到
金城坊裏託幽居
家貧頗類賢人巷
地靜何煩長者車
近郭好山青映戶
小橋流水綠通渠
衣冠鄰曲皆鄒魯
來往清言數起予

二十年來列從官
玉堂高處切金鑾
哀遲有幸遷清秩
匡輔無才愧素餐
朝退書帷閑獨坐
吟餘塵事不相干
自憐此樂從前少
身荷君恩欲報難

愛竹堂為楊主事賦

堂前修竹先人種看竹升堂思不禁正直終存君子節
清虛猶見昔賢心靈旂疑下雲垂屋仙珮如聞風滿林
自是著存長不忘豈同三月愛山陰

送吳員外赴南京禮部

春坊中允同袍舊十五年來間濶深此日帝城重握手
西風祖道又分襟蒼茫薊樹凌寒景縹緲淮雲接暮陰
知到南京公事簡紫金山色對青吟

輓金鳳儀

昔為御史南京住朝罷相過不厭頻每愛容儀誇白璧
還看文采映青春飛騰雲漢非闕早淪落泥塗獨未伸
空使時人嗟定命銘文三復為傷神

次韻答仲熙庶子見寄

時鄒有室
家之喜

習懶忘機已歲餘還應力疾効馳驅衰遲豈有消埃助
談詠都將故舊疎倚檻桃花開畫障夾渠楊柳映齋居
閒情想見城東曲欲和陽春愧不如

金華方處士輓詩

鄉里過從駕小車平時蕭散有誰如幽人日聚清芬閣
處士星明寶婺墟乘化已翔雲外鶴傳家猶貯壁間書
石梁歲歲行人度共說何公德有餘

送劉訓術歸西昌

冠帶逍遙桑梓間浮雲長共此心閑家傳大父青烏祕
門對仙人白鶴山五年江外三回見八月燕南一棹還
萬里歸來誰得似獨無塵土浣清顏

松居為餘杭詹道士作

紫霄玄居靜不扃長松如蓋對亭亭深涵雨露千年潤
高拂煙霞萬仞青仙子時來下白鶴道人畫坐詠黃庭
會當天柱峯前去共汲丹泉煮茯苓

送胡士璉貴州按察使

二首

澹雲心事堅冰操白首如公見幾人撫字久煩熊軾重
澄清今睹芻冠新亂山啼鳥蠻煙裏深樹蟠蛇獠水濱
何幸明時建官府會持輕典播皇仁

聖主恤民頻有詔遠臣宣化豈無聞激揚自古關王政

表率于今仗使君淮水揚颿侵曉月楚皋飛旆拂秋雲
獨嗟二十年相好復此匆匆惜袂分

送彭士揚歸西昌

二首

鄉山南望飛雲外萬里還家綵服成心事已同秋水淨
宦情渾似晚煙輕亦知衰薄慙閭里且復歡娛慰父兄
後夜光輝動牛斗書船應汴豫章城

故家獨抱遺經在蚤有清名動縉紳致禮持煩東道主
承歡常戀北堂親龍洲晚色明紅樹魚浦秋波漾白蘋

自是思歸歸未得，可堪長日送歸人。

送羅知州還廣德

薊門二月柳初青，未有長條折贈行。
遠道共懷羈旅意，同鄉不盡別離情。
花臨河上家家發，山過淮南處處清。
民吏桐川迎望久，經遊且莫滯雙旌。

陳頤僉事輓詩

早歲賢科擢俊英，明時憲府佐澄清。
常持風裁民皆畏，獨以寬平政自成。
萬里趨朝淹客舍，幾人含泣送銘旌。

孤兒扶柩南閩路落月啼烏最愴情

周公明教諭半竹軒

先生瀟洒溪園秀與竹從來金石交作室不教金代瓦
隔塵還已勝編茅清宜帳下諸生詠儉任門前俗客嘲
更傍石欄移數挺閤常風月聽笙匏

賦得花園送梁主事

地近南城尺五天萬家繁盛似雲連花熏歌妓樓中勻
柳映行人陌上韉來往紛紛皆駐轂別離款款更張筵

知君過此頻回首心戀彤墀玉陛前

寄思貽兄

兄弟分攜總白頭楚雲煙樹思悠悠每聞夜雨懷連榻
屢看秋鴻獨倚樓京國衣裳淹日月鄉園夢寐繞松楸
金盤原上青山下投老歸田共飯牛

南山停雲張澈郎中求賦

門對南山紫翠深白雲長日抱山岑清連飛澗垂朝彩
幽傍懸蘿駐夕陰五色會看光捧日九霄終待出為霖

松楸只在微茫下早晚從知係寸心

送蕭雅容郎中歸南京吏部

都門新酒鬱金香窈窕箏彈陌上桑
煙柳千絲牽別恨春花萬點映行裝
碧山近帶金陵郭白雪清含粉署郎
官府日長無一事寄詩頻到五雲坊

曾復鉉雪舫齋

傍溪齋舍小於舟含素凝華曙影浮
已喜虛明宜宴坐何妨安穩寄寒流
簷前風絮疑翻浪窗外瑤林欲隱洲

自有詩書可娛興不消更向剡中遊

送尤文度赴貴州叅議兼寄武昌故舊

三十年前江漢上清風瀟洒共襟期折蘭閒詠離騷賦
看竹頻過孝感祠已幸兩京重論舊何堪萬里又分岐
故人相遇應相問為道非才負聖時

送淮安劉千戶致仕歸吉水

二十承官累策勲腰間寶劔動星文老辭淮水歸文水
閒謝青雲向白雲鄰里應懷前學士

晃卷其
故交

兒童爭識

舊將軍芙蓉峯下滄洲曲時採林芳與客分

劉氏松筠軒

西昌城西松竹深開軒幽絕坐繁陰常疑白晝起雷雨
還樂清夜聞璆琳一從薊北淹羈旅十載天涯思故林
亦有茅堂傍東郭白頭南望最關心

送劉生

客舍餘春雨正繁憐渠萬里到柴門相看已是諸孫行
漸長能知大父恩共愛名駒輕道路又逢新雁憶鄉園

松筠軒裏遺書在歸約良朋更討論

輓孫子充

金壁承家好弟兄至今鄉里憶持平
早逢兵亂真能養晚避徵書不愛名
流水青山遺舊隱白雲芳草閔新塋
相思豈必曾相識一讀銘文已愴情

李縣丞之官臨臯

小年閭巷共嬉遊邂逅京華總白頭
奉使曾持巴郡檄之官又買潞河舟
嶺南翠霧含津樹海上紅霞映縣樓

懷挹公餘清似水題詩還憶寄中州

尹道冲八十受封

蕭散春秋八袞高少年曾署華州曹恩封初出麒麟殿
宮錦新裁獬豸袍玉屑丹砂和石髓青山碧樹暎林皋
仙人自在煙霞外五色凌雲有鳳毛

送錢侍讀

日上搏桑麗九天蓬萊高閣五雲連才華久在論思地
明聖方需侍從賢歸旆曉飛河濟外文星夜暎斗牛邊

全家帝澤霑幽顯錦詒翔鸞百代傳

送彭毓敬

嘗為政和令坐累
被謫復起為學官

臨清小邑俯河濱學館蕭條迥絕塵談道勝為百里宰
開筵常接兩京人風霜跋涉愁堪老鄉里交游意獨親
但有聲華光帝命相逢不恨別離頻

送龍公常之建寧驛丞

咸淳進士衡州佐異代風流見遠孫謁選三年依北闕
承恩二月發南轅官程僻遠稀迎客廨宇清幽不閉門

碧水丹山足閒暇頻收書冊玩微言

早入天壽山候陪祭長陵 二首

塵起山中失路蹊肩輿扶過石橋西夜深風露寒仍淺
月轉星河影漸低傍澗幾人同駐馬隔林何處屢聞雞
東方立待瞳矓曙紫殿前頭望不迷

萬里蒼梧去不還宮車千古閔橋山日華閒映芙蓉殿
雲氣深連虎豹關扶病此時瞻玉几傷心何處望龍顏
遺臣泣盡餘年淚天上烏號不可攀

送袁止安太常受誥後還餘干

三首

清廟沈沈接泰壇十年齋潔領祠官奏章屢上紅雲殿
賜服曾無白玉冠常有道心如鏡淨由來公署帶冰寒
新承天上絲綸寵歸及番易父老看

一鶴南飛自玉京江東人識步虛聲色分玉井芙蓉秀
氣挹金莖沆瀣清道術不須丹液法仙家元住白雲城
還攜龍虎山中侶共向蓬萊頂上行

蕭散浮雲流水蹤少年湖海與君同豈知黃鶴樓前別

金匱要略卷二
又向蒼龍闕下逢主組有時還暇逸琴書隨意共從容
無應俱傍西江住獨自蒲帆趁北風

送李永懷歸東平

霜花初下雁南飛葭蒼蒼柳欲稀落日故人千里別
寒風汶水一帆歸盛年典郡民皆愛清代成名志不違
幾度都門聚還散何時同返故園扉

謁長陵

憶昔六龍升御日最先承詔上鑾坡論思虛薄年華遠

霄漢飛騰寵命多空有赤心常捧日不禁清淚欲成河
文孫繼統今明聖供奉無能奈老何

謁獻陵

海宇洪熙戴至尊愚臣殿陛最蒙恩常依黼扆承清問
每荷綸音獎直言萬古茲山藏玉劒九霄何路從金根
餘生莫罄涓埃報血淚橫膺不忍論

晚同宗豫先歸詣清河途中寄勉仁弘濟

載書先發赴前營雨汜飛埃晚更晴人喜望家三舍近

馬知歸路四蹄輕風飄點點溪花送日射行行野樹明
却憶今宵羶帳底翠壺紅燭伴雙清

送陳正倫御史赴南陽知府

盛時冠豸兼衣繡柏府霜臺歲已深宦達共嗟門似水
家貧新賜帶橫金褰帷綠野觀春稼拄笏黃堂對曉岑
正已齋中有餘暇青編還究古人心

酬張子俊中書惠畫

不盡平生山水興勞君健筆寫清幽流雲欲送千峯雨

飛瀑深涵五月秋，玉筍匡廬渾在目。
天台秦望亦忘憂，白頭經濟曾何補。
只好投簪約共遊。

太常丁博士陞工部員外赴南京

頌臺迢遞切紅雲，博士官閒淨俗氛。
禮典曾陪青瑣議，仙韶常到紫壇聞。
薊門柳暗欣簪盍，潞渚荷香惜袂分。
此去陞遷展才用，共誰時論考工文。

送江御史蕙寄林懋弘

十年冠豸侍明廷，詞苑編摩況有聲。
不效雁鷗馳世譽，

直將冰蘂重臺評吳城霜下迎驄馬浙水秋高駐旂旌
應共三山林憲使玉壺寒露烟雙清

從游西苑

廣寒宮殿屬天家曉從宸游駐翠華瓊液總頒仙掌露
金支皆挿御筵花棹穿萍藻波間雪旗颭芙蓉水上霞
身世真超人境外玉盤親捧棗如瓜

送陳時顯歸南京兼簡廣哲

二首

聯官玉署多年別考績金臺兩度逢往昔知心成落落

即今分手復匆匆
薊門雨挾風聲急
潞渚波連海氣濃
無限離情阻相送
青山杳杳樹濛濛

素襟不受一塵縑
文苑英游共所知
舊羨丰姿清似玉
今看衰鬢亦成絲
柏堂晝掩無公務
竹檻春吟有妙辭
想共東鄰歐主事
清談常過夕鐘時

寄胡若思賓客

樂靜忘憂養性靈
豫章城外一茅亭
窗涵南浦千尋碧
門對西山萬疊青
每羨林泉歸倦翼
獨憐江海尚浮萍

已知安邑渾無累猶有人求伏氏經

已酉元夕偕行儉學夔公緒百鍊并攜藎秣市

中觀燈遂過退菴小酌即席賦詩得誰字

貂帽藜筇信所之良朋稚子暮追隨物情已覺春光好
燭影還於月色宜一世緇塵空老大幾人白首共襟期
今宵且對燈前醉來歲燈前知對誰

送劉參議赴廣東

二十餘年聯近侍揮毫常在鳳凰池每憐分署踈歡聚

況及逢春又別離
滿地綠陰榕樹合
繞簷紅顆荔枝垂
時平畫省多公暇
預想清吟續隱之

早朝應制

天香初引玉爐熏
日照龍墀綵仗分
閭闔九重通御氣
蓬萊五色護祥雲
班聯文武齊鵷鷺
慶合華夷致鳳麟

是日南夷貢麟

聖主臨軒萬年壽
敬陳明德贊堯勲

從狩密雲早發次韻幼孜

雞鳴滄海浴朝暾
起換征裘倒別尊
上馬好音喧鼓吹

逼人清氣滿乾坤
旌旗雲擁中軍幄
劒戟霜明列校屯
載筆從容侍田獵
暮年有幸共承恩

駐蹕峪口少師蹇公少保金公尚書胡公及予
奉旨先歸道中風寒小憩洪勝寺

聖主深恩恤老臣
賜歸先渡白河濱
御營晝日承三接
驛路颼風共四人
滿地寒蕪行雉兔
誰家荒塚伏麒麟
山僧頗解空王法
延客焚香話六塵

送潘景昭致仕歸永嘉

素節清名玉不如忽承優詔賜閒居青坊舊振郎官筆
金匱新藏史氏書歸橐人嗟一羽重懸車誰及二毛初
黃花翠竹溫州郭晏歲高情樂有餘

送吳敏德南京僉都御史

九重圖治任才賢白簡凝霜載畫船共喜芝蘭出蕭艾
已知鸞鳳異鷹鷂淮山渺渺飛雲外薊樹亭亭落照前
相好相違重相憶好音時聽路人傳

丹徒何彥澄皆春堂

百畝藥畦春浩蕩濟人渾是太和心
泉香橘畔蘇耽井
花滿雲邊董奉林
靈劑不須酬
白壁丹砂自可致
黃金
南徐城下滄江水
會比何家陰德深

送張嘉會赴封川

繡衣前日下臺端
百里清霜綠幕寒
不恨逢人雙眼白
共憐為國寸心丹
蒼茫晏歲遷除遠
繾綣同鄉執別難
自有平生冰操在
嶺梅還似舊時看

過鵝兒嶺巡檢司悼蕭長史

二首

王門輔相真公選老病思歸竟不歸盡職總知行直道
愛身翻見蹈危機山籠曉霧深迷戍灘響寒濤近繞扉
白首來經遷謫地感懷惟有淚沾衣

萬里邊隅千疊山桑乾河上閔榛管向來物論嗟投玉
至竟天恩未賜環早以傳經重閭里曾看奏疏動朝班
平生一片貞松色猶在交遊夢寐間

送陳廷器通政

公材士行總推賢憲府儒宮近屢遷共識丹心明白日

也應華髮歎流年芙蓉浦淑秋風後鴻雁汀洲夕照前
此地相逢又相送交情長為別離牽

賜文淵閣五色菊一本應制

一簇秋香護錦屏聯芳競彩自天成何須芝瑞矜三秀
已似奎躔聚五星開處正當彤陛好賜來還稱玉堂清
世傳此植能頤壽萬歲千秋祝聖明

紹興王氏居竹軒

萬玉森森翠作林王家清致自山陰開軒六月暑氣薄

閉門一逕秋雲深晴當霄漢看鸞舞夜或風雨聞龍吟
歲寒栗冽不改色共矢平生金石心

慶行儉初度并贈禮闈校文之行

三首

三朝冠紱殿東頭人物當今第一流銀漢奎文光午夜
玉壺寒露炯清秋終知鼎鼐歸台輔共待經綸闡大猷
二月帝城春似海壽筵先醉紫金甌

高門奕奕縣東西文獻楊王自昔齊當代飛騰聯玉署
半生華寵共金閨風霜樗散慙空老霄漢鵬搏望不迷

未許明時慕丘壑須將旱歲作雲霓
三載興賢選俊英九重宣詔付銓衡從來節操推公道
況是文章擅老成春院下簾心獨苦夜燈開卷眼偏明
掄才為國真無忝預詠臺萊頌太平

送孫修撰

五色衣裁繡錦明三年歸謁稱深情芙蓉浪颭娟娟淨
楊柳風生澹澹清颿影曉經揚子渡劒光秋望富州城
詞垣官俸堪多釀遙想高堂聚德星

賜遊西苑同諸學士作

東風御苑物華新吉日遊觀命近臣
金甕特頒千日醞玉盤兼賜八珍
淳翠含楊柳橋邊霧香汎芙蓉水上
雲魚躍鳶飛皆化育須看海宇頌皇仁

廣寒高出倚晴霄清暑開臨蟠螭橋
鳳闕九重通窈窕龍章五彩護岩堯
霞明翠浪成漂錦風振瓊林協奏韶
山水足供仁智樂十春萬歲奉唐堯

日照千門萬戶開參差樓觀出飛臺
地靈長看紅雲繞

天近時迎翠輦來絕好西山如華嶽何須東海覓蓬萊
微臣幾度陪遊豫欲繼卷阿愧乏才

玄洲閭苑五雲迷紫殿彤樓衆岫低日射飛甍金署榜
虹連閣道玉為梯灑筵好雨霏微過傍席清禽覲曉啼
欲報深恩何以祝皇圖帝壽與天齊

送孫從吉主事

河上蘆葭初著霜臨河撾鼓發官航面承天語朝辭闕
身著宮袍晝近鄉錦樹拂雲明使旆碧山如畫對仙郎

由來襟抱清于玉寫得梅花好寄將

送解禎期無憶大紳

萬里賜環遼海外鳳池依舊寵恩濃共欣遭際承千載
又沐優閒謝九重草草離觴對寒菊迢迢歸棹逐秋鴻
臨岐重有傷心處不見名家阮嗣宗

贈族姪之勉

盛時楊氏三登仕文獻西昌第一家諸老儀刑隨逝水
百年譜牒看分瓜遠來論舊歡娛淺臨別題詩感慨賒

金史卷之二
獨近五雲洲畔住好敦忠信作生涯

齋宿次韻曾學士

退朝齋閣息精神接席香帷總縉紳
茶送蒙山兼顧渚琴彈子夜又陽春
坐聞玉漏傳西掖起看龍光繞北辰
吉日郊禋集繁祉慶成預擬拜楓宸

送蕭生下第南歸

少年懷寶謁京畿又向明時下第歸
薊北鶯啼春後滿淮南樹色雨中微
手披經史常忘食家傍園林靜掩扉

終待秋風六翮健九霄雲淨看高飛

懷來應制

霜紅碧樹被巖阿流水青山喜再過
田事總知今歲好人煙況比昔年多
彩雲飛蓋隨雕輦白玉行尊載紫駝
聖主時平此巡省會聞游豫出謳歌

留別羅學古員外并解佩劍贈之

紫塞西風九月秋千官祇從六龍游
故人邂逅能青眼老我驅馳已白頭
馬上擁貂晨共發尊前燒蠟暮相留

關城又是分襟處解贈吳鈞慰別愁

上清袁止安寄詩余以寫竹奉酬并步來韻

京華一別歲頻更長憶同年老弟兄軒冕無心暫同俗
山林有道竟違榮石田過雨瓊芝潤金籙開函玉女清
貌得崑丘青鳳羽因風遙答故交情

題竹送周侍郎

鴈下蘆葦澤國寒扁舟獨去路漫漫年來已恨舊交少
老至偏傷遠別難親見謀猷裨國計極知勞瘁濟民艱

一竿淇上清於玉持贈南州歲晚看

送劉巡檢赴廣東

奏最晨看拜紫宸陞官遙赴海南濱身趨玉陛祇辭主
家過金川喜覲親紅蓼桂花明水驛青松柳葉暗蠻津
休言弓馬非吾事會有恩威服遠人

蕭時中挽詩

當日興賢對大廷天門金榜冠羣英一經勤苦承家世
千載遭逢荷聖明溟海鵬鵬真自致蘭茗翡翠不勝清

可憐萬里歸埋玉欲賦招魂慘不成

送張宗海修撰致仕

京國交情三十載別離憂緒百千端
故人有道相違遠多病無能自効難
已看文章留玉署也知江海憶金鑾
扶搖九萬公先奮會待雲霄接羽翰

送梁紹輝三衢教授

兩朝國史奏書成濟濟官曹進秩榮
郡守方需漢博士泮宮行對魯諸生
鶯啼燕語連城綠水色山光繞郭清

應似高齋趙閱道捲簾吟詠暢幽情

送崇述謁告還鄉并問訊若思

白髮朝冠在石渠故園松竹夢幽居
顰封國史收金匱榮拜天恩下玉除
曉岸綠蕪飛燕子春江新水上鰣魚
經過定見頤菴老為謝衰遲久曠書

自題東皋小像

玉華之東鷗渚潯柴門蕭蕭松竹陰
平生自乏經濟略抱甕已忘榮祿心
一日天書照雲谷十年蓬鬢戴朝簪

文章無補治世用矯首南山煙樹深

送馮欽訓郎中持節使安陸

事畢却過武昌訪宗族

金冊頒恩玉璽封秋清四牡出南宮九華飛翠迎江上
白雪操絃候郢中使者通經才不忝親王祇命禮兼隆
故家文獻存遺譜歸過沙溪覓姓馮

送柴侍郎

大將行邊淨楚氛多才司馬更能文岑參隴外多傳賦
韓愈淮西力贊勲刁斗三更鳴塞月旌旗千隊拂關雲

陣前敵愾功誰最早致封章玉陛聞



東里詩集卷二

欽定四庫全書

集部

東里詩集卷三

詳校官檢討

臣

羅國俊

中書

臣

劉源溥覆勘

總校官進士

臣

楊懋珩

校對官中書

臣

范鏊

謄錄監生

臣

周桐

欽定四庫全書

東里詩集卷三

明 楊士奇 撰

五言絕句

古意答伯陽

河洲雙鴛鴦流蕩還相逐皎皎白楊花風吹不相續

吳教授席上同伯陽汲井詠

皎潔如明鏡銅甌下愈深粒成不照影應恐墜金簪

夜發清江口

日落煙水寒解纜清江渚中夜北風來相送潭州去

長沙三詠

定王臺

臺高登望迴臺平馳射寬平高各有志民力空獨難

賈誼井

迢迢俯碧甃濛濛翳紫苔猶傳賈太傅知歷漢朝來

馬王宮

今為佛寺

君王金盛日宮殿此沈沈歌舞無人見唯餘鍾梵音

送龍參歸南昌

淥水明堪染桃花吐未齊君歸渡南浦春草正萋萋

畫蘭

湘靈結芳馨含思望遙浦夫君殊未來蘭珮徒容與

姚山給事求山居六詠

山齋

春至還往稀日照山窗靜時有石泉鳴泠泠入孤聽

玩古軒

常好古人言玩索此軒中誰言千載上不與此心同

竹磴

修竹蔭南磴脩脩淨於洗獨往坐清陰彈琴對流水

清陰谷

陽和二三月綠柳垂滿地春風吹整開望見南山際

白石坡

松間白石坡復帶莓苔碧常有素心人獨行看鳥跡

埜亭

秋日埜亭上四望盡青山飛鳥去無極白雲相對閒

邳州城下夜雨

薄暮風色寒移舟宿前渚歌枕不成眠孤篷夜來雨

過谷亭

明月轉檣竿露下孤篷濕欲繫谷亭舟沙頭風正急

早發長溝

秋水被隄岸牽舟不可涉渺渺見平湖北風吹荷葉

夾溝遇邑人問家信

聞道故鄉來辭家今遠近恐有南京書停舟試相問

畫魚

水清菱葉稀洞見溪流下出入多慎重恐有垂綸者

臨川謝氏雙節堂

二首

獨抱孤兒在空帷泣夜深誰家姑與婦相繼柏舟吟
謝氏懸雙壁團團似月圓光輝百年後長為照臨川

題五清小畫

五首

昔年林下住掃石坐成羣已愧顏光祿幽情詠五君

山林含古翠蕭爽水亭虛豈乏幽棲者臨清此玩魚
何人不擾擾一棹獨蕭閒天霽疎林外乘流坐看山
不學袁安卧悠然敞素軒山林明一色清意滿乾坤
南枝與北枝葳蕤動寥廓自有歲寒心不隨橫吹落

題蘭

澧浦月浮津曾逢解佩人至今香露夕思殺楚鄉春
騎馬向長安冠塵每日彈不知幽谷裏誰坐擘芳蘭

度石門嶺

石徑浮雲上攀緣險莫當一心祇扈蹕不敢戒垂堂

蕭氏石岡十景詩為省身賦

石岡橋

君家石岡側門對石橋幽橋下澄源水還歸蕭峽流

石壁

危石翠如削影浸澄湖波六月不知暑香風生芰荷

青泥灘

近接金魚塢來往弄輕橈水清下見底白石如瓊瑤

梁家潭

江流匯為潭其下深無極時有雲霧興疑是蛟龍宅

長派洲

逶迤長派洲近帶珠林浦八月秋風清瀾漫熟禾黍

箭湖砦

嶢嶢紫霞表周迴石如櫛曾逢百歲人閒說兵戈日

拜雨亭

寸雲起東谷行空散為霖殷勤望拜者寧識雲無心

王仙祠

騎鶴去已遠庭餘昔年樹擾擾祈靈人鼓鐘動朝暮

吉祥菴

石岡清絕處蘭若傍巖開年遠僧稀少經廊生綠苔

題四皓子期子猷太白四圖

萬疊青山外林居瀕澗濱儵然四老者知是茹芝人
瀟灑林下居清冷膝上琴高山與流水千載一知音
凍合千山雪荒村愁未眠誰知乘興者夜棹剡溪船

靈岳乾坤秀飛泉河漢垂超然山水興身在白雲涯

畫牛 四首

萬物各有適逍遙大化中當知畫史意重有育民功
策馬二十年常懷顛蹶憂蚩蚩弄雛者真乘百斛舟
散誕春耕餘牧兒亦有樂常以蓑笠隨為防風雨作
牧人歸不早溪頭風雨急還顧母子情相追未相及

居庸關彈琴峽

峽石記彈琴泠泠流水音不知行路者誰有聽琴心

沙城

臨水一荒城風沙常眯目城裏半流人荆扉掩茅屋

攬轡

款段獨行遲攬轡亦自適天清無片雲遙遙見山色

曉晴

周廬夜半雨蕭蕭不成響曉起看晴明雪滿青山上

贈筇竹

愛爾生正直仗爾扶衰老道路有險夷出入常相保

代筇答

正直余何有道義卿所持但自保堅固無論險與夷

龍虎臺

高臺久已傾蒿蓬紛簇簇猶存龍虎名常散牛羊牧

通州 二首

城倚紅雲下門臨綠水濱寶鞍馳駿馬多是帝京人
清淺潞河流常維萬里舟越羅將蜀錦充滿潞濱樓

題畫 二首

仙桃千歲紅青爵相因依知是瑤池使東來幾日歸
花開簷蔔林雙禽弄香雪動植乘化機當此艷陽月

畫鶉 二首

秋至未黍熟霜含枸杞紅鶉衣自有適瀟洒立西風
疎菊吐幽華清鶉澹無與獨立亦翛然襪襪艷文羽

六言絕句

題鄂渚贈別圖送人歸廬陵 二首

鸚鵡江中紅樹鳳凰城裏青山借問來游幾日秋水蘭

舟獨還

客遊黃鶴磯畔家住金魚浦前心似波間明月隨君先
過螺川

題畫

鳥啼花落春暮雲白山青雨餘溪南有客訪隱林下何
人著書

晚發安山驛和答金公素

二首

津頭賣瓜未過村中釀黍纔沽薄暮安山道上蕭蕭白

葦黃榆

荒渚菰蒲帶雨隔河籬
落飛煙淮南渺渺何處悵望秋
鴻去邊

題山水小畫贈康甥歸西昌

鳬渚斜通鶴逕水亭靜對林扉
羣峯雲際相待一棹江南未歸

尋麻林早發

四更零露衣濕十里飄風帽斜足
底河流石澁馬頭月

色雲遮

七言絕句

三十六灣

湘陰縣南江水斜春來兩岸無人家
深林日午鳥啼歇
開遍滿山紅白花

江上早行

漢陽樓上鼓初稀
煙柳朧朧一鵲飛
乘月不知行處遠
滿江風露濕人衣

次韻王山人二月十六日對雪

初和柳絮飄侵檻復共梨花舞傍人一種妍華看不定
只憑高調和陽春

次韻題向誠所藏蘇明遠寫菊

金門五朝一下直靜樂軒中坐日長為看秋花有真意
只題詩句不焚香

次韻蔣立恭清明上塚

去年載酒東郊路水畔花前醉詠詩今日壠頭空灑飯

傷心思憶去年時

枯木竹石為王山人題

蒼桷翠柏含煙霧
總以掄才入廟廊
自在空山名散木
珊瑚石畔老冰霜

獨持貞操立雲根
春雨秋風閱歷頻
不覺流年成老大
眼中渾見鳳毛新

寄蕭德通兄弟

金殿瑤階紫禁闌
戴星趨拜戴星歸
一官侍從渾無補

慚愧當年舊布衣

桃花源上昔投閒
長憶君家玉樹間
酒散涼亭紅日晚
石臺臨水看青山

題李伯高畫

芙蓉峯下滄洲畔
碧水迴環漾白沙
聞說草堂鄰杏塢
年年花發照春霞

題金侍講雲山障子

浮雲滿山如玉潔
山光下映幽人居
柴門落葉可俯拾

林下日長應著書

玉峽山人

玉峽山人雪滿顛
初承徵詔遠朝天
賜歸還向峽中去
春雨溫波好放船

寄思貽兄

四首

思貽先生守道園
池邊竹下敞幽軒
焚香坐隱烏皮几
隔水蒼山正對門

溪上流虹映壁經
溪頭春樹拂簷青
小車閑日何人到

會有光華動德星

未報君恩未乞身
每看南雁重傷神
清溪亦是朝宗水
遙想臨流憶遠人

螺湖盤古白雲堆
憶著常因夢裏回
得似籃輿引諸弟
年年霜露及時來

寄蔣用文院判

二首

冬風浙瀝隔窗紗
丹室紅光藹曙霞
想見病餘清似鶴
閒研玉雪詠梅花

旦氣清明體力輕
不堪鳴珮拜彤庭
緝熙齋裏熏金鴨
應著醫經幾卷成

簡胡學士索木芙蓉栽

牡丹芍藥皆嫵麗
總怯風霜不耐秋
只好芙蓉伴修竹
清華晚映北窗幽

聞種拒霜遮水檻
春前分乞數枝栽
總知宋玉才情絕
會約花時作賦來

輓顏子明

三首

五彩春霞繡綺袍文章無復看揮毫相思惟有南山色
彷彿當年意氣高

貴里侯家甲第開經過長是勒車回守立宅裏尋常到
此去何因更一來

南浦江山一旦空行吟誰復繼高蹤薇垣柏府多知己
猶為傳經惜馬融

九日懷黃學士

二首

年年賜宴捧萸觴同沐皇恩近御床今日江南望江北

不知何處醉重陽

去時相約看黃花花滿園林未到家惆悵別來無一字
西風極目雁行斜

送梁本之納溪教諭

二首

西過瀘洲是納溪錦江還在納溪西此去家鄉五十里
青山朝暮對猿啼

煙柵霧柏富奇材梁柱還須匠石裁刀布不勞齋計吏
聖朝今選學官來

早至儀真

白沙岸頭秋氣清
儀真郭裏早潮生
五雲北望金臺路
初是朝天第一程

早至淮安

百丈牽船夜未休
滿衣涼露不勝秋
前林欲近聞雞唱
城郭朧朧見楚州

發淮安

岸蓼疎紅水荇青
淡菰花白小如萍
雙鬟短袖慚人見

背立船頭自采菱

夜過徐州

怒濤翻河亂石橫
牽船上洪初月明
夜中不辨黃樓處
惟聽層城鐘鼓聲

望濟寧

疎翠輕紅水岸迂
漁家遠近暎菰蒲
高城前望晴雲下
却記行程是半途

花園望北京

黃金宮闕望都門預喜明朝謁聖君
萬歲山高騰王氣
五雲天上煥龍文

奉天門早見後午被召至右順門晚退口號

紫禁西連萬歲山宣呼重入覲龍顏
拜承聖語丁寧訓
滿袖天香出九關

早過良鄉

馬上風沙拂面飛凝霜如雪墮征衣
平明行盡良鄉郭
茅屋人家未啟扉

莫州同王邦彥張伯原飲道傍民家

雄縣城南水沒路莫州市裏酒如油客行相聚且一醉

不見越人空古丘

近城有扁鵲墓

阻風雪德州有懷王邦彥司直

蕭條風雪夜深寒短棹臨津欲發難却憶故人單騎去
誰家茅店解征鞍

重過安山驛懷金公素

共買蘭舟北去時尚書相送此分違傷心未抵今朝重

金安四庫全書
卷三
萬里承恩只獨歸

送張令赴麻陽

亂山蠻樹向人低
遙綰銅章赴五溪
為想春風與嘉政
新年俱到夜郎西

題陸伴讀伯陽草書後

前廿年陸為余草書謝宣城詩
陸不作已十年偶發
篋睹其故蹟愴然興懷

蘭繞春庭露氣清
往年同詠謝宣城
龍蛇滿紙看遺墨

忽亂山陽笛裏情

友蘭陸
齋名

題梅送胡方大歸廬陵

葭莢蕭條半著霜故人迢遞泝歸航
東風無限江南意因爾牽情萬里長

胡學士在北京聞予病寄詩慰問次韻奉酬

玉堂新署綠陰涼日想承宣近御床
班馬雄詞真特達唐虞化日正舒長

平明閭闔九天開玉佩趨朝百辟來
聖主正需調鼎用

諸公應薦和羹梅

盛世才華翰苑多
龍光星彩貫天河
自憐同在承恩地
不奈頻年遠別何

頭白目昏過五十
不禁四體病交攻
君恩未有涓埃報
却怪書來感歎同

繡錦傳來五色絲
翔鸞翥鳳粲離離
知公頭白丹心在
況是文章老不衰

朝回清坐廣文壇
病起閒逃蘇晉禪
了徹六塵成夢覺

邇來三月已無眠

盡戀長生養性靈
力求大藥扣玄扃
莊生自有逍遙論
不道千齡勝百齡

紅心驛

馬頭近見紅心驛
茅屋參差半酒家
瀟洒赤欄橋外柳
西風吹折數枝斜

夜宿臨淮營夢种子

二首

腸斷經年隔死生
因何隨夢到行營
營前淮水深千丈

得及人間父子情

繞膝踉蹌捧一編分明夢裏見娟娟臨淮營內中宵月
應照來生未了緣

早過宿州

月轉西林曉霧收霜華如雪擁貂裘馬前清景山無數
帶得餘酣過宿州

陪謁徐王廟

閔子鄉中詢父老徐王廟下駐旂旄廟前山勢如鸞鳳

萬古塗山相對高

范增墓

元有望氣者盜發其墓取劍

千年寶劍無光氣
衰草寒煙野水鄰
同是遺骸葬徐土
當時陵母識天人

題趙仲穆畫馬

二首

紫霧團身白玉蹄
權奇倜儻渥洼姿
王孫慣見升平事
貌得當年入貢時

十二天閑總駿才
追風躡景是龍媒
曾隨六御臨關塞

親過流沙萬里來

卷三

子啟學士見過僕適他出不遇奉簡

二首

西城過雨淨無泥楊柳風輕散馬蹄
虛有琴徽待高會却慚書札負前題

東鄰西舍總風流何處垂楊繫紫騮
想見斜陽擁歸旆不同雪夜剡溪舟

子啟見和再用韻奉簡時曾新市馬

雨晴沙淨不沾泥新試嬌驄白玉蹄
款款金城坊裏去

過門鳳字不教題

城上西山翠欲流
愛山不驟紫驂留
還如揚子江頭看
萬疊芙蓉近綵舟

習禮見和用韻奉酬并簡宗璉

四首

玉署詞華照紫泥
逢人不博鑄金蹄
綠楊庭館閒風月
朝退從容每自題

綠陰池沼擅風流
長繫青驂當紫騮
自愛官曹清似水
不妨書舍小於舟

不解高陽醉似泥一壺時共薦豚蹄半酣藻思如泉湧
錦軸華牋取次題

雅操俱當第一流逸材千里見驂騑閑來同坐北窗下
如在清風李郭舟

胡祭酒食葵而病戲用奉簡兼謝惠蔬

二首

雨後畦蔬嘉可觀忽聞憔悴卧幽軒非是安心無妙法

誰教放手刈葵根

胡近作詩自謂有安心法

萬慮澄清不入懷飯蔬飲水小茅齋却慚口腹猶貽累

頻致園官菜把來

簡胡祭酒

三首

重陽醉後又三日想見黃花綻始多門巷深沈無俗客
高齋清坐養天和

滿城冠珮趨朝謁得似頤菴獨自閒心與天光共明淨
朝朝爽氣對西山

朝來邂逅西江客報道今年盛有秋但得萬方同歲稔
吾生貧病不須愁

唐人醉歸圖為金學士題

翩翩六駿出騰驤
醉裏衣冠見盛唐
彷彿開元無事日
不知誰是賀知章

正月廿九日戲簡仲熙庶子三絕句時鄒從舍
城東

蕭散雙吹碧玉簫
與君同郡復同袍
金城坊裏清如水
却愛東飛學伯勞

新歲新齋好著書
文明門裏會文儒
隔鄰春酒蒲萄熟

誰綰青絲送玉壺

正月已終將二月城中咫尺見還難
金門朝籍皆先送
獨遣同寮待長官

題小畫寄史志靜

二首

春含竹樹翠淋漓
玉立蒼蒼太古姿
久別儀曹文翰侶
江南薊北贈相思

為有高情共歲寒
別來相憶訪平安
憑將一片南州意
寄與清曹粉署看

金幼孚輓詩

三首

卷三

獨攜書史傍林泉
榮利由來意澹然
時遶金川看玉笋
未曾輕到縣門前

雪崖風節凜飛霜
蕙帶蘭褱道味長
剩貯詩書遺諸子
鄉人共詫白眉郎

昔歲京華住接鄰
論文來往日頻頻
十年不見成終古
洒淚東風為故人

題畫寄思貽兄

多情不忍看離羣
況復雙清共拂雲
薊北江南六千里
白頭兄弟兩鄉分

非所秋夕寄示康甥

二首

一點寒燈照黯然
哀蛩四壁夜無眠
傍人解識詞垣老
為歎重來未十年

五十無聞將六十
不才孤負寵恩深
惟應一片清秋月
解照平生報主心

非所寄習禮

二首

舍外周遭無隙地，積芻曾畏短簷間。
紫茄綠瓠霜前摘，擬借西園五尺閒。

采采黃花定滿枝，東鄰西舍共襟期。
銀瓶注酒清於玉，醉裏題詩看少誰。

題畫

竹樹紛紛翠欲迷，山雲半歛水禽啼。
何人自有清幽趣，不放扁舟過剡溪。

南昌羅氏仰高樓

紅塵市裏浩漫漫車馬東西引避難獨起高樓出塵外
青山天際卷簾看

隔浦飛來萬仭青仰高樓外玉為屏南昌千古西山並
別有東湖孺子亭

宣德丙午謁二陵 二首

去年侍從謁長陵此日重來慟倍增春柳春花渾似昔
獻陵陵樹復層層

君恩追憶不勝哀老淚乾枯病骨摧陵下一來腸一斷

金匱要略卷三
餘生知復幾迴來

題漂陽兩王先生歸榮圖 三首

壯歲青雲鴈序分
白頭歸里更情親
一門壽俊聯雙壁
海內于今見幾人

畫錦相輝入故園
連枝競爽並高年
從前心事清如水
晚得幽閒不愧天

康樂才名我素交
惠連文苑舊同袍
眼看逸翮聯翮去
不盡中情悵望勞

過將臺

二首

風雲長護崇臺下
昔日文皇此誓師
至竟蒼天輔真主
英雄捲地從龍旂

指揮虎旅誓皇天
舊將猶能說往年
龍去鼎湖雲渺渺
遺臣過此重潸然

有懷子啟行儉時彥時勉諸君子

霜滿貂裘月滿天
四更騎馬白河邊
玉堂學士無公務
正擁青綾足晏眠

扈從巡邊至宣府往還雜詩

十首

北斗初高月未斜
五更清露淨塵沙
道邊叢繞爐香立
多是耆人候翠華

居庸關中四十里
迴岡複嶺度縈紆
道傍石刻無人識

盡是前朝蒙去聲古書

關柳行行葉乍稀
西風猶未振霜威
聖情預憫隨營士
勅下尚書盡賜衣

聖恩不已恤殘軀
老拙深慚報効無
屢酌金壺賜甘醴

還令中使護輕輿

邊屯今歲盛豐登倉庾家家積粟盈何幸王師此遊豫
大車藁秸進行營

紅葉離離淨可書綠渠流水見游魚老臣虛拜貂裘賜
一路陽和護屬車

邊閫當時任老臣邊頭千里淨無塵御營上謁多恩賚
天語還聞獎諭頻

山望雞鳴勢入雲下循仄徑棘紛紛不辭涉險觀遺碣

重是歐陽太史文

圭齋

關外初冬似早春僧房猶見菊花新時平扈從巡邊塞

宣府回鑾只二旬

宣府秦上谷郡

懷來城外夜微雪風送輕寒初著身明旦馬前紅一色

回軍共試賜衣新

侍從海子飛放應制

五首

碧山翠海帝王州鳳蓋霓旌護冕旒何幸升平無事日

衣冠祇從六龍遊

帝德含弘在至仁乾坤萬物總皆春天池浩浩嬉魚鳥
御苑蹌蹌集鳳麟

靈沼融融冬不冰如雲鳬鴈與鷗鵬吾皇盛德惟蕃育
不重鷹鵬搏擊能

宜網臨郊一面張凌雲排霧任飛翔古今田獵三驅樂
惟有殷湯與聖皇

玉座金輿俯綠漪水光林影漾龍旂豈如漢武橫汾樂
正似周文在沼時

題金文鼎清風樓卷 五首

白日紅塵深復深
九衢車馬驟駸駸
小樓獨坐清風裏
如在湘川渭水潯

世上浮榮了不知
閒調綠綺理朱絲
樓頭只許徽之造
樓外從人歌竹枝

清風颯颯清雲深
六月樓中暑不侵
朝陽光輝下鳳彩
暮雨鬢髩聞龍吟

百年誰繼趙松雪
近數毗陵王紱高
忽復乘雲去無跡

登樓懷憶使心勞

先生已別金陵去
歸住吳淞近海濱
淇澳瀟湘隨處有
清風明月共何人

題墨菊寄宗璉

二首

曾伴金城坊裏住
鄰園日日看花來
高秋九月毗陵郡
瀟洒何人共酒杯

思誠齋裏清如水
坐對幽花晚自香
共有故園螺渚上
幾時歸去賞秋芳

以絹問張子俊求畫

夢憶衡廬紫翠重，結巢須倚玉芙蓉。
天恩未便教投紱，一幅鶯溪更惱公。

索子俊中書畫松

千歲徂徠古翠蟠，拂雲含霧瀉風湍。
畢宏韋偃君今是，煩寫高堂五月寒。

入薊州界

雲淨天清紫翠浮，好山消盡越鄉愁。
行人如有江南興，

馬上題詩入薊州

薊州道中見菊花有懷子啟時彥行儉時勉諸

君子 二首

秋光漸近重陽節
緩轡垂鞭踏軟沙
却憶玉堂閒白晝
誰家庭館看黃花

想見聯鑣西出城
酒壺詩卷共高情
看山騎馬漁陽郭
也似平坡寺裏行

灤河道中同楊太常宣夏二員外小酌柳下觀

魚 二首

四人坐酌垂楊下共愛清陰覆綠渠
未盡一壺還上馬却將閒散羨游魚

雲白山青護四圍水邊楊柳翠如幃
人間無處無幽境何補明時獨未歸

題梅贈以穰

攜手河梁欲別難故鄉南去路漫漫
一枝林下清如玉但保風霜到歲寒

遇山居老有感 二首

細柳鮮桃漱澗春
白雲流水淨無塵
看渠鶴髮林居者
只傍青山老此身

著處溪山可置身
古人求志不求聞
從前未有匡時術
只合攜家傍白雲

夢亡妻 二首

孟光憔悴病來容
昨夜蒼茫夢裏逢
還似往年臨別日
匆匆勞苦為紉縫

經時未遂葬山丘
賢行終身慟不休
勤儉成家長兒女
一生辛苦為黔婁

送彛訓兼問訊子勤

三首

鑾坡鳳沼接清班
憶昔同朝侍聖顏
此日相逢又相送
傷心回首見橋山

之官渺渺江南去
便道還家著錦衣
萬里誰無桑梓意
同鄉惆悵未同歸

故人為郡端溪上
前月書來歎索居
同是貞元舊供奉

因君更問近何如

題菊送別

送行漸及黃花節
江北江南白露寒
為有清香宜晚歲
獨憐彭澤未休官

唐馬為士啟題

二首

玉花驄馬大宛來
倣儻權奇見異材
不道開元四十萬
駑駘安得望龍媒

雄姿逸氣真龍種
赤霧團身白玉蹄
自是西來第一匹

東風蕭散不聞嘶

鬼谷圮橋東山雲房四圖為金學士題

靡靡王風嘆黍離周公已遠仲尼衰乘車擁蓋諸侯客
只說陽城鬼谷師

神遇圮橋豈偶然君臣契合亦千年不逢龍準真明主
三傑何人解識賢

莫道征西舊司馬平生山水愜幽尋白頭匡濟成何事
回首東山感慨深

雲白山青琪樹綠神仙咫尺隔塵凡
九還真訣逢師授
自此流傳到呂巖

楊學士以海棠雙鵲圖贈其弟歸求題

楊家庭館風光好花萼連枝錦不如
況是和鳴雙翠羽
相親相樂似雍渠

萬里京華臨別日海棠花發欲春深
遙知晴鵲先將喜
啼滿龍津碧樹林

張緝熙監丞輓詩 四首

二十年前同史館北京邂逅更情親傷心此日賢關外
相向西風哭故人

八品儒官坐辟雍白頭心事古人同至今鼓篋橋門者
灑淚相思說至公

兩京學省聚賢英試問何人不負丞官舍一羶清似水
後來相繼屬誰能

死去悲吟滿縉紳共嗟直道不憂貧不知駟馬高車客
身後如公有幾人

王孟安筆花軒 三首

絲綸閣下染龍香
幸得蒙恩侍玉皇
元自筆花軒裏進
常時親灑出天章

清世高才與博聞
軒中來訪日紛紛
文章誰合傳千載
三秀靈芝五色雲

當代中書海內傳
尚論勲業不論錢
贈公憑寫天人策
肯逐揚雄浪草玄

王御史竹索題

千尺雲霄翳翠鸞畫圖猶似倚窗看臺中別有凌霜柏
與爾青青共歲寒

題馬

二首

滿身雲影濕津津何用能空冀北羣
踏鐵猶矜千里足
連錢時動五花文

曾隨六御歷沙場初解鈎膺白玉環
只合清時謝羈束
春風散誕華山陽

錢舜舉松溪待渡圖為姜司諫題

二首

翠黛連山綠漲隄扁舟長倚岸東西人家知是吳興往
還傍茗溪傍雪溪

槿籬茅舍水村幽林彩山光積翠浮空使行人愁望渴
隔溪閒却木蘭舟

五月八日史館困睡夢侍獻陵顧問邊事覺而
感賦

陰山瀚海已澄清猶似當年軫聖情萬事傷心同夢過
白頭清淚不勝零

文淵閣前芍藥盛開對酒偶成

東風又放玉堂春，麗色清香滿意新。
有酒相懽莫虛負。

今年頓減去年人。

金少保曾學士宣郎中
不數月皆沒愴然有感

清明有感

西江南望渺天涯，歲歲清明不在家。
蕩日飄風無定著，亂人情思是楊花。

黃母王夫人輓詩二首

珠翟雲冠五福身，綵衣看舞瑞麒麟。
乘鸞一去知何處。

女範長留教後人

口訓詩書手辟繡月涵滄海出明珠夜中環珮歸來此
啼殺堂前返哺烏

楊河竹枝 二首

屯堡人家住不多屯邊屈曲是楊河
褰裳濡足不計數
河上行人愁奈何

客子離家半月程風沙引起憶家情
河中鯉魚不得覓
尺素何由寄北京

輓彭叙古

二首

年過二十工書法
往往揮毫逼古人
身被君恩無一歲
可憐埋玉楚江濱

死別纔知見面難
旅墳荒草暮雲寒
幾迴東角樓前過
拾得遺書不忍看

甲寅初度感懷

二首

翰苑春坊清切地
從來未有效涓埃
天朝三十三年祿
虛負君恩養不才

先塋夜夜夢家山身繫君恩未遣還祭厚不如生養薄
奠杯祗益涕洟瀾

回鑾

是日
微雪

萬乘回鑾指玉京行營笳鼓雜歌聲山靈亦有懼愉意
數點瑤華送羽旌

題倪元鎮畫

琴牀書几一塵無散髮雲林不受呼清閼閣中賓客盡
時因遺墨見倪迂

居庸道中竹枝

二首

牽車馳馬夜無停不辨容顏只辨聲
非是長歌卽長歎一般行路兩般情

千車萬騎度關山獨坐肩輿帖帖安
傳與家人莫相憶不曾辛苦不曾寒

次韻弘濟過居庸佛院懷幼孜

二首

又隨翠輦度居庸不復當年語笑同
下馬還尋舊遊處傷心寒樹起秋風

並登仙閣愧才庸三十年間進秩同何日南帆汴瀟峽
冢前持酒酹西風

時思堂

二首

樹有深根水有源音容夢寐記生存堂中日日頻繫薦
不稱從來罔極恩

春雨秋霜繫所思傷心舞綵竟無期後來六簋陳祠祭
得似承歡菽水時

集句

送尤安禮

集詩

君子之馬送友也友人歸吳而麗澤之益將日疏焉
故集詩句以道其情

君子之馬六轡如絲言念君子如璋如圭其德不爽敬
慎威儀

君子之馬六轡沃若言念君子如金如錫其德不回威
儀抑抑

豈無他人不如友生邂逅相遇德音不忘惠而好我示

我周行

言笑晏晏維予與女女轉棄予誰與獨處中心養養往

送于野

與子成說方何為期既曰歸止曷云能來子寧不來悠
悠我思

卧病答黎信十首

集杜

隔戶楊柳弱嫋嫋孰知茅齋絕低小人生留滯生理難
強移栖息一枝安朋知來問覩我顏安得廣厦千萬間

青春欲盡急還鄉身欲奮飛病在牀荆揚春冬異風土
終日懣懣思羈旅形神寂寞甘辛苦世人那得知其故
自斷此生休問天濁醪麤飯任吾年將詩不必萬人傳
小兒學問止論語恰有三百青銅錢

天時人事只相催懷抱何時獨好開氣酣日落西風來
口雖吟詠心中哀亦知窮愁安在哉生前相遇且銜杯
江上人家桃樹枝千朵萬朵壓枝低風妬紅花却倒吹
人生幾何春已夏應須肯酒送生涯

今日苦短昨日休萬壑東逝無停留江花未盡會江樓
長歌短詠還相酬請公一來消我愁

此鄉之人氣量窄我獨覺子神充實十日不一見顏色
時復看雲淚沾臆感時撫事增惋傷人生會合不可常
草閣柴扉星散居不道故人無素書素書一月凡一束
紙長要自三過讀故人相見未從容令我心中苦不足
寒雨颯颯枯樹濕欲往城南忘南北感君意氣無所惜
昔者相過今不得此心烟烟君應識

鄉里衣冠不乏賢煎膠續絃竒自見前者途中一相見
去馬來牛不復辨令渠述作與同遊宿昔一逢無此流

感遇答夏四秀才三首


集李

搖曳雙彩鳳欲集無珍木昨下閭風岑飄揚竟何託梧
桐巢燕雀反栖惡木根人生難稱意雄豪安足論

綠幘誰家子灼灼芙蓉姿銀鞍照白馬玉壺繫青絲行
行未能已治遊方及時我志在刪述但為此輩嗤

去去復去去天地一逆旅石火無留光良辰竟何許取

酒會四鄰行樂須及春黃金高北斗浮榮何足珍



東里詩集卷三